

heraus gestrichen: Achte ichs dißmals für ganz vnnöthig / E. Key. May. mit mehrern Lob dieser edlen Kunst zu molestirn / vnd quasi Cramben bis coctam, bey E. Key. May. königlichen Taffel zu obtrudiren: Lasse es derowegen bey wol ermeldter Doctorn, vnd anderer mehr Scriptis commendatitiis, vber diese himmlische hohe Kunst / vnd derselben Nutzbarkeit dißmals auch aller dings beruhen vnd bewenden.

Sintemal aber ELIAS ARTISTA, von deme Theophrastus prophereyhet / Fr. Basilius vnd Alexander von Süchten auch Meldung darvon thun / ohne zweiffel nicht lang mehr aussen bleiben kan / sondern schon wol allbereit / als ein rechter ungezweiffelter Vorbott vnd Præcursor CHRISTI IESV ad iudicium vniuersale venturi, auff der Bahn ist / welcher vnsern Teutschen Monarcham AVREOLVM Ph. Theophrastum PARACELSV, in Theologia GRATIÆ, Astronomia GRATIÆ, PHILOSOPHIA GRATIÆ, wie auch in Medicina GRATIÆ, vnd andern Faculteten vnnnd Artibus mehr repræsentirn, auch seine Scripta elucidirn vnnnd declarirn, / ja ein rechter Mysteriarcha vnnnd Interpres seyn wirdt der Göttlichen / vberhimmlischen Magnalium vnd Geheimnussen Gottes / so er in seine Creatura gelegt: so wirdt darob die Gottlose / verruchte / blinde / vnd in allerhand Sünd / Schand / Lastern vnd Vntugenden ersoffene vnd ertrunkene Welt erschrecken / vnd verstummen müssen / das kleine Häufflein aber der Nachfolger / vnd Liebhaber der edlen Kunst ALCHYMIÆ, als der himmlischen Warheit / wird sich von Herzen darob erfreuen / vnd Gott für solche gnädige Offenbarung danken.

Darumb trage ich auch (der ich doch als ein vnwürdiger Tyro zu diesem Studio kommen / vnnnd gleich wol von Jugendt auff Lust / Lieb vnnnd nicht geringe Anmuthung vnnnd Affectio dazu gehabt) ein herzlich sehnlich Verlangen nach dieses zukünftigen / ja vielleicht schon gegenwertigen ELIÆ Ankunfft vnd Offenbarung / damit doch Gottes allerheyligster / großmächtigster